

यूहन्नासे भिबा सोमरेमला चिठी

चु चिठीला बारेरी पाङ्तो:मा

भिबा म्हि: मण्डलीदा च्याबा म्हिसे भिबा मुबा (३ यूहन्ना १:१)। बाइबलला ल्हाना हङ्बा विद्वानगदेसे चु मण्डलीदा च्याबा म्हि चा येथूला मुल चेला यूहन्ना हिन्ना भिसी पाङ्बा मुला।

भिबा ग्ला: पक्का था आरे, तर कोइ कोइ बाइबल विद्वानगदेसे एफिसस शहरग्याम तखम्ला भिसी पाङ्बा मुला।

भिबा साल: ल्हाना हङ्बा बाइबल विद्वानगदेसे ओस्पन ईश्वी संवत् ६० (विक्रम संवत् १४७) सालरी भिबा मुबा भिसी पाङ्बा मुला।

खाल्दा भिबा: गायस भिबा म्हिदा भिबा मुबा।

चु चिठीरी यूहन्नासे गायसदा ज्यबा म्हि भिसी पाङ्बा मुला, तिगदा भिसम थेसे विश्वास लबागदेदा हो लबा मुबा। ओच्छे यूहन्नासे डेमेत्रियस भिबा म्हिग्याम होशियार तसी चिउ भिसी गायसदा पाङ्बा मुला।

मुल तामगदे

- फ्याफुल्बा १-४
- गायसला बारेरी पाङ्बा ज्यबा ताम ५-८
- डियोत्रिफसदा दोष लबा ताम ६-१०
- डेमेत्रियसला बारेरी पाङ्बा ज्यबा ताम ११-१२
- चिठीला थुमरी भिबा ताम १३-१५

यूहन्नासे भिबा सोमरेमला चिठी

१ लास्सो डाला सेम निबा हो गायस, डा मण्डलीदा च्याबा म्हिग्याम फ्याफुल्ला! सत्य ताम अन्छार भ्रबा एदा डाइ सेमहेन्सेन माया लबा मुला।* २डाला सेम निबा हो, ए विश्वासरी ज्यबा मुला भिबा ताम डादा था मुला। थेहङ् लसीन एदा सदन ज्यबा तगै भिसी डाइ एला लागिरी प्रार्थना लबा मुला। ३ए विश्वासरी कोङ्बा मुला भिबादेन सत्यरी चिबा मुला भिबा ताम म्राङ्सी थेग्याम खबा कोइ कोइ ज्योज्यो आलेगदेसे डादा पाङ्जी। थे ताम थे:सी डा ल्हानान ताङ्बा मुला। ४थेहङ् लसी डाला कोलागदे सत्यरी भ्रबा मुला भिबा ताम थे:म्याङ्बा भन्दा घेन ताङ्बा ताम डाला लागिरी अर्गु तिगै आरे।

**सत्य तामरी गिक तबागदेदा
सेमहेन्सेन हो लउ**

५डाला सेम निबा हो, एसे जम्मान ज्योज्यो आले नाना आडागदेला लागिरी विश्वासला गे लबा मुला।

एसे डोसेबा ज्योज्यो आले नाना आडागदेला लागिरी जे आहिन, डोआसेबा ज्योज्यो आले नाना आडागदेला लागिरीएनोन गे लबा मुला। ६एसे थेनीगदेदा गाते माया लसी वास्ता लजी भिबा ताम थेनीगदेसे मण्डलीला डाच्छा पाङ्बा मुला। थेनीगदेसे लबारी छ्याङ्बा गेरी एसे अफ् हो लसम एला गेग्याम परमेश्वर ताङ्ला। ७तिगदा भिसम थेनीगदे प्रभुला गे लबारी भ्रबासे लमा प्रभुदा विश्वास आलबा म्हिगदेग्याम तिगै स्हे आकिन्ना खबा मुला। ८थेतबासेलमा सत्य तामरी गिक तबाला लागिरी थेनीगदेदेन छ्याम ढिक्सी य्हाङ्से चुहङ्बा गे लबा म्हिगदेदा हो लतो:ला।

९डाइ मण्डलीला लागिरी तिगै ताम भ्रिबा मुबा। तर एनीगदेला गुडरी मुबा ह्हाङ्से ह्हाङ्दान घेन म्हन्बा डियोत्रिफससे डाला तामदा वास्ता आलनी। १०डा थेरी खमा थेसे लबा जम्मान ताम एनीगदेदा पाङ्ला। थेसे य्हाङ्ला बिरोध लसी लुसीला

ताम लबा मुला। चुदे जे आहिन, थेसे विश्वासी ज्योज्यो आले नाना आडागदेदा वास्ता आलमुला। ओच्छे वास्ता लबारी म्हाइबागदेदाएनोन मण्डलीग्याम मङ्ग्यार तेःमुला।

११ डाला सेम निबा हो, ए आज्यबा तामला लिच्छा थाभ्रउ, तर ज्यबा तामला लिच्छा भ्रउ। जुन म्हिसे ज्यबा लला थे परमेश्वरला म्हि हिन्ना। तर जुन म्हिसे आज्यबा लला थेसे परमेश्वरदा डोसेबा आरे। १२ तर डेमेत्रियसदा चा जम्मासेन ज्यबा म्हि हिन्ना भिसी पाङ्मुला, चु ताम मी थेसे लबा सत्य गेग्यामसेन था याङ्ला।

थेला बारेरी स्थान्दो म्हिगदेसे पाङ्बा ताम डन्सेनोन पाङ्खम्ला। डन्से पाङ्बा ताम सत्य ताम जे तमुला भिबा ताम एनीगदेदा थानोन मुला।

१३ डाइ पाङ्तोःबा ताम मी ल्हानान मुबा। तसैनोन दान्दे डादा चिठीरी भिबा सेम आरे। १४ तर यहाड योनान हुप तला भिसी डाइ आश लबा मुला, यहाड हुप तसीन जम्मान ताम लला।

१५ एदेन छ्याम परमेश्वरला शान्ति तगै। चुरी मुबा जम्मान ह्योगदेसेनोन एदा फ्याफुल्ला भिसी पाङ्बा मुला। थेरी मुबा जम्मान ह्योगदेदाएनोन डाइ फ्याफुल्बा मुला भिसी पाङ्सी पिन्गो।